



Dili, 18 Abril 2017

Konferensia Imprensa

Rede ba Rai husu Prezidente Republika Atu Promulga Pakote Lei ba Rai

Iha oportunidade ida ne'e Rede ba Rai (RbR) mai ho pozisaun ida ne'ebe forte katak atu salva no proteje comunidade vulneravel sira nia direitu ba rai, hodi fo seguransa-estabilidade ba comunidade sira nia moris nomos hodi evita violasaun barak ne'ebe kontra prinsipu direitus umanus. Ami hanoin katak to'o ona tempu atu iha Lei ba Rai, iha Timor-Leste.

Prazer bot hodi hato'o konferensia imprensa iha loron ohin, iha tempu hanesan proposta Pakote Lei ba Rai 3: Regime Espesial ba Definisaun Titularidade ba Soin-Imovel; Expropriasaun ba Utilidade Publika; no Baze Ordenamentu Teritoriu, ne'ebe iha loron 4 Abril 2017, Prezidente Republika haruka ba Tribunal Supremu Justisa, hodi halo apresiasaun preventiva no fiskalizaun abstratu, hafoin sei haruka fali ba Prezidente Republika hodi foti desizaun.

Ita hatene katak tinan ida ne'e, ita iha momentu importante tanba iha Eleisaun Prezidensial iha fulan kotuk no Eleisaun Parlamentar ne'ebe sei hala'o iha fulan hirak tuir mai. Atual momentu ne'e krusial ba oportunidade hodi foti desizaun partikularmente liga ho Pakote Lei ba Rai 3 ne'e. Maibe Rede ba Rai fiar metin ba Sua Excelensia Taur Matan Ruak durante ne'e hala'o ona knar hodi defende povu kiak nia direitu no sei kontinua defende to'o mandatu remata.

Liu husi konferensia imprensa ne'e Rede ba Rai ho ninia Membru 24, ne'ebe kompostu husi NGO Lokal, Internasional, UNAER nomos Individu hakarak hato'o ami nia Pozisaun hodi husu ba **Prezidente Republika Atu Promulga Pakote Lei ba Rai 3 ne'e**.

Hare ba desenvolvimentu politika nomos infrastrutura fiziku ne'ebe kontinua hala'o iha Timor Leste, mai ho analiza ne'ebe klean ba prosesu hirak ne'e hotu, Rede ba Rai ho UNAER hanoin katak:

- 1). Timor Leste presiza duni iha Lei ba Rai atu bele iha serteja juridika hodi garante comunidade sira nia direitu ba rai no hela fatin, tanba povu maioria moris iha kiak nia laran atual depende ba rai atu sobrevive;
- 2). Lei ne'e define klaru "Direitu informál propriedade nian" maka direitu kona-ba soin-imovel orijinadu haktuir direitu kostumeiru no dekorrente hosi pose kleur, ne'ebé iha karakteristikas esensial hanesan direitu propriedade;
- 3). Lei ne'e suficiente ona atu proteje povu nia direitu na'in ba rai no hela fatin, wainhira Estadu atu foti rai uza ba interese publiku. Tanba Lei ba Rai seidauk iha, Governu sempre uza oportunidade ne'e hodi produz Dekretu Lei, Rezolusaun nomos Deliberaun hodi foti comunidade sira nia rai, iha ne'ebe hamosu injustisa bot ba sira nia direitu nudar nain ba rai. Ezemplu kazu Suai Supply Base, Governu produz Dekretu Lei 36/2014 Transmite Direitu Rai ba Projetu Suai Supply Base nune'e mos ZEESM,

Autoridade RAEOA produz Deliberação Da Autoridade Nº. 5 /2016 de 29 de Setembro, husu comunidade prova titulu rai, kuandu sira reklama nain ba rai;

4). Lei ne'e sei rezolve problema balu mak akontese iha pasadu nomos atual (uza mekanismu uzukapiaun hodi fo posse ba ema ne'ebe hela iha rai pedasuk ida hahu ka to'o 31 Dezembru 1998 bele sai nain ba rai ne'e, maski sira la iha sertifikadu perfeita ka hak milik), no rai nain anterior sei hetan indemnizasaun;

5). Lei ne'e fo enfaze kona ba despeju tenke realiza kondisaun ne'ebe garante ba ema nia dignidade umana, direitu ba seguransa no respeita ba prinsipiu proporsionalidade, adekuasaun nomos la iha diskriminasaun;

6). Ami preokupa tebes wainhira hein Governu foun 2017-2022, atu aprova ba Pakote Lei ba Rai 3 ne'e, ida ne'e bele lori dezastre bot ba povu kbiit laek sira nia direitu atu asesu ba rai no hela fatin iha futuro. Tanba politiku nain sira bele halo mudansa ba Pakote Lei ba Rai 3 ne'e atu serve sira nia interese, duke atu promove no proteje comunidade kbiit laek sira nia direitu.

Hanesan ami hateten ona katak iha tinan ida ne'e ita iha momentu importante tanba sei iha Eleisaun Parlamentar, ne'e nudar momentu krusial ba oportunidade hodi foti desizaun atu Promulga Pakote Lei ba Rai 3 ne'e. Maibe iha momentu hanesan povu sira expecta ba lideransa nasaun ida ne'e nian atu bele rezolve sira nia preokupasaun sira kona ba direitu nain ba rai, iha ne'ebe dala barak viola husi ukun nain sira.

Rede ba Rai fiar katak ho komitmentu ne'ebe forte ita sei halo susesu bot no ami konta ho Sua Excelensia Taur Matan Ruak nia suporta nomos kooperasaun.

Ikus liu ami fiar metin Prezidente Republika sei konsidera ami nia proposta ne'e, hodi Promulga Pakote Lei ba Rai 3 ne'e.

Hahu 2008 too agora Rede ba Rai halo monitorizasaun no advokasia ba prosesu desenvolvimentu Pakote Lei ba Rai 3 ne'e. Ho nune'e enkoraja ami nia servisu sira hodi promove direitu no bem estar povu nian, liu-liu sira ne'ebe mak kbiit laek.

Ami kontente tebes atu responde ba ita bot nia pergunta sira. Obrigada wain.

Responsabiliza husi:

Ines Martins
Koordenadora ETM RbR
+670 7819 7416

Julio da Silva
Koordenador Legal RbR
+670 7744 1326

Hato'o husi Membru Organizasaun nomos Individu:

- | | | | |
|----------------------|-----------------|--------------|-------------------------|
| 1. Fundasaun Haburas | 7. Luta Hamutuk | 13. Oxfam | 16. Feliciano de Araujo |
| 2. La'ó Hamutuk | 8. FTM | 14. Liberta | 17. Cris Caetano |
| 3. Belun | 9. Acbit | 15. Fongtil | 18. Jurista Advokasia |
| 4. KSI | 10. Ita ba Paz | 16. Hasatil | 19. Ajar |
| 5. JSMP | 11. MDI | 17. CGT | 20. JPC |
| 6. Asosiasaun Hak | 12. UNAER | 18. Meabh C. | 21. Fokupers |